

Chief Secretary-i 65buba ZSU general session maotsü



Nagaland Chief Secretary, Dr. J. Alam IAS-i 65buba Zhavame Students' Union (ZSU) general session nung shilem agiba mapang tangokba noksa nung angur.

Dimapur, Luchii/December 21 (TYO): Nagaland Chief Secretary, Dr. J. Alam IAS-i 65buba Zhavame Students' Union (ZSU) general session maotsüogo, koba Phek kübok Amphitheatre, Pame Tsude, Zhavame yimtsüng nung December 21 nü agia liasü.

Iba sentong ya 'Equipping Students for a Brighter Tomorrow' omen nung ajemdaker agi. Sentong nung o jembiba mapang Dr. J. Alam-i, state nung takar sobaliba aser

inyakyim indang jembi, koba ajanga Naga nung terenlok nung teyari agütsür, ta ashi. Taküm nung nükjidong tejangja ayutsü atema kaketshirtem ayongzüka Alam-i, kaketshirtem dang arts, music, saisapong mesüra sorkar mapa nung ketdangsür akümtsü pei nükjidong aliba tongtetsü atema meranga inyaksü ajungshia liasü.

Chief Secretary-isa, Zhavame yimtsüng nung terenlok maparentem asoshi pai kanga

stüoki ia bilemer aser Zhavachi nungi Zhavame yimtsüng sendakteptsü atema lenmang yanglutsü koba Zhavame yimtsüngi benoka liasü iba ya agizüka lenmang yanglutsü atema sen lakh metsürpongu lemsütsüogo, ta ashi.

Iba sentong nung NSF tir Medovi Rhi tetushi tejaoker liasü aser Section Officer, SCERT, Verekhru Domeh ya general session shibangba sentong nung alakteta jaoker liasü.

Dimapur nung oshi benjung mungogo



Dimapur, Luchii/December 21 (TYO): International jenjang nung kanga nüngtugu literary organization Akhil Bharatiya Sarv Bhasha Sanskriti Samanvay Samiti indang 21buba National Convention December 21 nü Rashtra Bhasha Hindi Sansthan, Padampukhuri, Dimapur nung takok ngua tembangogo. Anogo asem iba sentong ayongzüka agiba mapang Padma Shri asiir M. Piyongtemjen nem tetushi agüja liasü.

Iba sentong ya Patna, Bihar nungi nüngtugu scholar Dr. Anil Sulabh-i lapoktsü aser kasa

mapang nung alima ajunga nung kanga nüngtugu sangro mejemer, osangbener aser Max Muller Award ngur alisang Pandit Suresh Neerav lenisüba nung iba sentong agia liasü. Iba sentong ya Global Warming aser Universal Brotherhood onük dak ajemdaker agi.

Local convener P. Takalila aser Lemien Imsong nati ashiba agi, iba sentong ya Naga nung sobaliba tsüingsang aser ken tena tenzük aser sentong nung shilem agirtem pelashishia agizüka liasü.

Tongtibang sentong kaji Multilingual Kavi Sammelan ya

liasü, kong oshi balala nung sangro mejemertemi parnok indang sangrotem lemsatepa liasü. Sentong nungsa tzümpung wazüka ayutsü atema aser alima tesunep asoshi teyari agütsüba scholar tem nem naroküm balala agüja liasü.

Sentong nung kakat zülurtemi parnok mapa balala saya aser iba ajanga iba sentong tali takarba kümdakja liasü. 21buba National Convention ya India nung oshi aser sobaliba balala benjungba ka liasü aser iba ajanga linük nung telongjem tali adokdaksüogo.

ALI AYOKER

FOOTHILL LEMANG ANASA VIHOKHU NUNG ALI LEPSA-A AYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

Pughoboto Town Baptist Church tenlaki tasenba semzükogo

Dimapur, Luchii/December 21 (TYO): Pughoboto Town Baptist Church (PTBC) tenlaki tasenba December 21 nü semzüka jula nung aliba nüburtemi mapang talangka nung kanga yongyatepa aliba pungmang ka atalokogo.

Iba tenlaki tasenba ya Director Sumi Baptist Convention Rev. Dr. Khehovi Shohe-i semzüksü, shiba iba telaki lapokba sentong nung tongti o jembir liasü.

Sentong nung Convener Planning Board Kihoto H Wotsa, aser President Executive Council SABAK Dr. Hokishe G Sema natia salem osang tatsütsü lemsatep

asert Construction Convenor Er. Vikuto P Sheqi-i tepela o jembia liasü. Kasa mapang nung Co-convener Planning Board Bokavi Achumi-i achayanga tejaokertem nem tetushi agütsüba sentong agia liasü.

Tenlaki tasenba lapokba sentong ya Associate Pastor Women PTBC Aghali K Sheqi lenisüba nung agi. Sentong nungsa Pughoboto Town Baptist Church Choir ken ka aten, Director Drugs & Aids Healing Centre, Kuhazuqa Rev. Dr. Kivito Achumi-i o jembi aser Praise Band, PTBC-i nikongtsütsü revival sentong nung ken tena liasü.

Assam aser Naga nung kaketshirtem na ajuruteptsü



Dimapur, Dec.21 (TYO) : Assam aser Nagaland na arrtsü nung alir kaketshirtem rongnung tang aser tarutsü nung tesentaktep tajung nung lia aotsü nükjidong nung taruba küm Aenjeti (January) aser Tsüklai (February) nung kati ka state semdangtepba sentong ka tenzüksü renema lir.

Iba sentong tajung ya Border Peace Coordination Committee (Assam-Nagaland), BPCC(A-N) aser Friendship Forum (Tembayim Committee), Tzurangkong nati aneplua akatsü.

Iba sentong tenzüka taruba 2025 küm January 30 nü Assam nungi Bongshigopal High School aser Jungle Block High School na nungi class 9 pur parnok 30 den parnok tesayur aser tsüraburtem Tzurangkong Govt. High School tonga atutsü aser parnokji Chungtiayimsen aser

Watiyim nungertem den Tzurangkong High School nung tesayurtemi agizüka parnok kidang anendakja Aenejeti 31 aser Tsüklai ka tashi anepalutsü. Iba mapang kaketshirtem rongnung saisapong aser kentenmenü sentong balala agia pelateptsü aser otsü atonga shisalemsateptsü.

Iba sülen, Tsüklai 01 nü kasa tesem nung Jorhat aser Mokokchung DC na aruagi kaketshirtem ajurua parnok den külemi sobaliba sentong nung adentsü. Iba mapang Mokokchung DC-i Assam nung kaketshirtem nem sempet agütsütsü aser Jorhat DC-i Naga nung kaketshirtem nem sempet agütsütsü renema lir. Iba ama sentong ajanga state ana tsüngda teti yimjung nung alitsüsa putep tenzüksü imlar ta BPCC(A-N) lenirtemi metetdaksüogo.



Mokokchung, Luchii 21(TYO): Mokokchung Police Point nung December 20 aonung 36 Buba Children Christmas Cake Carol Competition -2024(C5) tetoktepba "Echoes of Joy" ta asüba omen nung ajemdaker nisung meyrirjnsng aika adenshia kanga dang temoatsü aser takok ngua agitetogo. Iba C5 tetoktepba nung MTBA kübok Fellowship 10 nungi tanur ajak agi 801-i shilem agi aser iba tetoktepba nung Aongza Youth Fellowship, A&D Youth Fellowship aser Penli Youth Fellowship parnoki mezüngbuba, tanabuba aser tasembuba jenjang ajangzüketa liasü. Mezüngbuba jenjang ajangzüketa Aongza Youth Fellowship puri atenba mapang tangokba noksa



"Inviting entire Dimapur to participate in the march heralding the birth of Christ. We request you to join in the merriment donning a Christmas hat to add more glamour."

Featuring

MERANGKONG MARCHING BAND

STRETCH:

DABA Church premise to Clock Tower via Notun Bosti and back.

23 | DEC | 2024

STARTING FROM 6:00 AM

Organised By

MERANGKONG SENSO TELONGJEM DIMAPUR

Special Request: Please bear with us for partial disruption of vehicular traffic

Russia-ia UNSC nung India Permanent züngsem shimtsü pusemer

New Delhi, December 21 (Agencies): UK, US aser France linüktemi UNSC nung India Permanent züngsem akümtsü pusemer. Russia-ia UNSC nung India permanent züngsem shimtsü pusemer.

December 19-20 anogotem nung Moscow nung 13buba India-Russia joint working group (JWG) on counter-terrorism cooperation senden amenba mapang nung Russia-i United Nations Security Council (UNSC) nung India Permanent züngsem akümtsü pusemer, ta ashi.

Iba senden nungji Russia aser India napronglai kiralongratsü atema senotsü agi yariba anema maneni longjemer raratsü bangjemogo.

"13buba JWG on counter-terrorism senden nung linük anapronglai kiralongra anema raraba lemsatop aser kiralongratsü atema senotsü agi yariba nokdangtsü atema taliba amalitepa inyaksü bangjemogo," ta MEA-i sangdong ka ajanga

metetdaksü.

MEA Secretary (West), Tanmaya Lal leniba nung India nung ketdangsertem JWG on counter-terrorism cooperation senden nungji aden. Iba senden nung Russian Federation nung Foreign Affairs Deputy Minister, Sergey Vershinin leniba nung ketdangsertem aden. Iba senden nungji linük anaprongla nung departments aser agency balala nungi tongti ketdangsertem aden.

December 19 nü Lal-i Russian deputy foreign minister, Mikhail Galuzin-a ajurua Ukraine nung rara densema international aser regional onüktem nung o lemtepa liasü.

Tang UNSC nung permanent züngsem ponguji United States, China, France, Russia aser United Kingdom lir aser non-permanent züngsemtembo kümsük küm ana atema dang melentepa shimer. 2021 nungi 2022 küm tashi India-a UNSC nung non-permanent züngsem liasü.

ISRO-i European Space Agency den tezüngzüktep ka agiogo

New Delhi, December 21 (Agencies): Honibarnü ISRO aser European Space Agency (ESA) nati space-i nisung yoktsü atema longjemer inyaksü asoshi tezüngzüktep ka agiogo.

Indian Space Research Organization (ISRO) Chairman, S. Somanath aser ESA Director General, Josef Aschbacher nati tezüngzüktep nungji sign süogo.

Iba tezüngzüktep kübok astronauts training agitsü, space experiments agitsü, space nung meimchir health research agitsü aser educational programs atema ISRO aser ESA nati longjemer inyaksü, ta ketdangsertemi metetdaksü.


Iba tezüngzüktep agiba tongti nükjidongji nisung space-i yoktsü aser space nung lenla tasen bushisüngdangtsü atema lir.

Iba project kübok Axiom-4 mission atema longjemer inyaksü aser iba mission atema ESA astronaut aser ISRO indang Gaganyatri astronaut naprongla shimtsü. Iba mission kübok

International Space Station (ISS) nung aliba Indian Principal Investigators leniba nung space nung scientific shisaliok bushitsü.

Axiom-4 mission dak alia ISRO aser ESA nati longjemer meimchir aser health research agitsü, technology demonstrations aser space experiments agitsü.

Iba tezüngzüktep kübok ISRO aser ESA nati longjemer tarutsü nung space janngarten aser scientist tem ajungmesotsü atema outreach aser educational programs renemtsü.



December 21, 2024 nü Chennai nung ISRO aser European Space Agency (ESA) na tsüngda tezüngzüktep ka agidang Indian Space Research Organisation (ISRO) chairman, S Somanath-i sign asüdang tangokba noksa nung angur.

ISRO-i tarutsü nung India nung space station 'Bharatiya Antariksh Station (BAS)' amenoktsü nükjidong yua lir.

ISRO-i ESA den longjemer inyaksü asoshi tezüngzüktep agiba ya ajanga space nung bushisüngdangba tsütsü ISRO ya kanga tongtibang agency ka akümtsü.

ISRO aser ESA na tsüngda tezüngzüktep agiba ajanga technology tejakleni aotsü atema maongka aika angutsü, senteper scientific research agitsü aser space-i nisung yoka research agiba maparen maneni inyaksü.

India aser France nati alima nung museum tulutiba yanglutsü

New Delhi, Luchii/December 21 (Agencies): Honibarnü External Affairs Minister, S. Jaishankar-i, 'soft power' atema sobaliba ajanga tongtibang shilem agir, ta metetdaksüba den külemi Raisina Hill nung North Block aser South Block nung alima nung museum tulutiba yanglutsü, ta metetdaksüogo.

India nung National Museum aser France Museums Développement na tsüngda tezüngzüktep ka agiba sentong nung Jaishankar-i iba osang ya metetdakja liasü.

India aser France nati longjemer alima nung museum tulutiba 'Yuga Yugeen Bharat National Museum' Delhi nung yanglutsü atema amalitepa inyaksü.

Honibarnü Delhi nung France aser India na tsüngda tezüngzüktep agiba sentong nungji Union Culture Minister Gajendra Singh Shekhawat, French ambassador to India, Thierry Mathou aser Union Culture Secretary Arunish Chawla nungera liasü.

Jaishankar-i, "Sobaliba tsütsü kanga tongtibang maparen ka atema longjemer inyaksü. Soft power atema sobaliba ya aisü nung kanga tongtibang, ta asenok ajaki metet," ta ashi.

Alima nung museum tulutibaji 'Yuga Yugeen Bharat National Museum' akümtsü aser iba museum nungji India nung kum 5,000 puti otsü dak sendakba putipuyang telemsa 8 alitsü.

Museum ji Delhi yimti

tiyongtsü nung aliba North Block aser South Block nung yanglutsü, ki tamentep asem asütsü aser takdang 950 alitsü.

Tang South Block nung External Affairs aser Defence Ministries aser North Block nung Finance aser Home Ministries amenoka lir.

Kasa sentong nung jembidang Culture Minister, Gajendra Singh Shekhawat-i, North Block nung mapping maparen tatembanglen kati arudar aser South Block nung mapping maparen tang teinyakdak lir, ta metetdaksü.

Paisa, "Iba museum renemba sülen mapang tatsüka tsüngda alima nung nisung teimtibai semdangba museum ji iba museum asütsü teimla lir," ta metetdaksü.

Madan Lokur UN Internal Justice Council nung Chairman shim

New Delhi, December 21 (Agencies): Taoba mapang Supreme Court nung judge, Madan B Lokur United Nations Internal Justice Council nung chairman shimogo; pa office kümsükji 2028 küm November 12 anogo tashi asütsü.

UN Secretary-General, Antonio Guterres-i, Supreme Court nung retired justice, Lokur iba council nung tekolak asütsü, ta metetdaksü.

UN Secretary General-i Lokur dang, "Ni tepela nung na Internal Justice Council nung züngsem ka dang masü saka chairperson shimba sangdonger; kümsükji November 12, 2028 nü tembangtsü," ta metetdaksü.

"Iba council nung tanüngba züngsemtemji - Carmen Artigas (Uruguay), staff temi shimba; Rosalie Balkin (Australia), management-i shimba; Stefan Brezina (Austria), staff representative; aser Jay Pozenel (United States of America), management representative nung asütsü," ta UN Secretary General-isa metetdaksü.

Justice Lokur ya 1953 küm aso aser 2012 küm June 4 nü Supreme Court nung judge shima liasü. Pa arrshi küm 65 abensaba sülen 2018 küm December 30 nü Judge nungi anisüngzüka liasü. 2019 küm Justice Lokur ya Fiji Supreme

Court nung non-resident panel judge shima liasü. India nungertem rongnungi tanga linük ka nung Supreme Court nung mezüngbuba judge shimbaji pa lir.

Pa ya taoba mapang Andhra Pradesh High Court aser Gauhati High Court naprongla nung Chief Justice liasü aser Delhi High Court nunga judge inyakogo.

Lokur ya Modern School, New Delhi nung azüngba sülen St. Joseph's College, Allahabad nung azüng. Pa St. Stephen's College, Delhi University nung graduate asü aser Faculty of Law, University of Delhi nungi Law degree ngua liasü.

NAGA TENEM NUNG AROGO TENZÜKBA ANOGO

~ Lima Longchar

(Maneni tapak 4 nungi...)

Godhula, tebutsü Lucy Molungkimong nung:

1872 April ita 6 anogo Godhula aser tebutsü Lucy Molungkimong nung alitsü atu. Iba yimsü tasen agizüka tzü nung Baptistsübaji iba putu tensa tesüngmangtsü mapa ka liasü. Yimsüsü anir yimkong mungdanga tatsü-talang ajak asadanga jembir tzünung Baptia yimsü tasen agizüksü pangjemtep. "Temoatsü süli, atakatem süli yimkong kulem asütsü taser kin tenük shia shimteter tzüsentsü lemtet". Yamaji Molungkimong nung nisung tuku (9) yisu yimsü tasenji agizüksü molungtet aser parnok Sibsagar Dikho ayong nung Dr. Clarki November 10, 1872 anogo baptitsü. Godhula aser parnok 9 Molungkimongi meyiba atu, aser tekulem ki ka yanglua idakji sentep ali.

Dr. Clarki mezüng Molungkimong semdangba:

Yimsü tasen amangtsü nübu jenti akum nung yimdak yimsüsürtemi jembir Sibsagari lua Dr. Clark anir atutsü lemtet, aser anogo züngshitepa yongsük süka bener atu, iba yongsük anogo shia ka ka indoktsü aser tatempangba yongsük anogo nung pa tanie alutsü ta züngshiteper senshi.. Parnok züngshitepba anogo shidak nung Molungkimong nung nokinketer nisung roker (60) lua Sibsagar atong. Sibsagar nungi apusoa arur mezüng aonung Colonel Buckingham Amguri Tea Estate par kidang konung mejang. Amguri nungi apusoa arur tanünü aonung Tero forest Tzurang tzükum nung yipzük. Sibsagar nungi apusoa arur anogo tasemnü (3) buba nung teroto meta ka Molungkimong süngkum lapoka aniket, iba anogoji Wednesday 18 December 1872 liasü. "On the appointed date, the elders of Molungkimong along with sixty young warriors, came down to Sibsagar with full ration, to escort Clark to the Hills". "Except for the nine newly baptised Christians, all the elders and the sixty (60) warriors were non- Christians. The journey took three days. The first night of Dec. 16, he took rest at Amguri with the hospitable English tea planter Colonel Buckingham. They spent the second night in the jungle and finally reached Molungkimong on Dec. 18 (Wednesday) 1872. On the following "Sabbath" Clark baptised (15) fifteen young men and organised the first Naga Baptist Church". (From Darkness To Light P.43.) "All night the Nagas lay toasting their feet around the campfire. This seemed to compensate for proper covering. Sentinels kept watch by turns, as there was an all too inviting prey for the wild beast and human enemies as well. For additional security the space around was made to bristle with pongees (small bamboo spikes) stuck in the ground. En route everything was done for the safety of my husband, and during his stay in the village no service was withheld which would in anywise contribute to his welfare." (A corner in India (A corner in India P.14) Iba aonungji pai Aruju nung telok dang Tsüngrem yimli indang jembia alidang aoksa osang ka among sungkum anükertemi sangoktsü. Nisung telok tulu ka arudar, tsükchir asü temba-er memetet itangji yimsüsürtemi ashi, teburtem ajak nok-nü renemang aser among sungkum nung atenshiang, aser Clark Sahibji Kenteneri meyima uang ta ayimoktsü. Kenteneri Dr. Clarki par anki tuko nung mendaktsü aser jara o süng agi nangpanga toktsü, aser ashi na ajem-ajema yangi ata-a liang. Iba sulen among sungkum nungi osang atoka ashi, ibai tsükchir masü, asen teyarir Oba Chungtia nung ta shia Clarki anitet ta jembiba tsürapuri shia aru. Dr. Clark anir atutsü osang Oba Chungtia danga agutsür liasü ta obula-obala nungeri jembia aru. Tamalen yimti sanger yim aika nungi Molungkimong amaktsü amokmerenba ali nung parnoki mulunga agizükba nisung tasenji tsükchir nungi kumzüksü atema jelia osang magutsü aluba liasü. Yimsü tasen bener aruba atema Oba Chungtia tenokdangba kecha magutsü, pelashishia Dr. Clark den ajuruteper senshi. Yamaji tebutechir yim na sangerji tesendaktep kanga takang liasü. Dr. Clark letter to his friend Alva C. Bowers. "While we were having a peaceful meeting, there was an alarm from the village gate, 'some people are coming!', everyone took weapons and got ready to fight, one of the elders informed me, that some young people from another more powerful village had reached the village gate. The elder told me, "they are not our enemies, but if they knew you are here, none of us can protect you. They will fight against us and your head will be taken away. I have no power to save you. Remain quiet. I will try to find a way to save you". Order was given to the villagers not to disclose that the 'white man' came. I was taken to a small room, where I could hardly breathe. Never in my life did I pray as I prayed that night. After half an hour, I was frightened by a running rat and the clapping of a cock's wings before crowing, Elder came smiling and called me out saying, "there is no danger, these people are your friends" I praised my heavenly Father for my life. God answered my prayer". Vide: From Darkness From Darkness To Light P.44. Yim anasa baptitsü atema ayong tajung mali, anungji jungli tzübu mesemshitsü yimsüsür den angatetepa jembitep. 1872 December 22 anogo nung Molungkimong nung nisung ter-pungu (15) jungli tzübu nungji Dr. Clarki baptitsü aser kibuba benjong agutsü. Anungji 22 Dec. 1872 anogo Naga lima nung mezüngbuba Baptist Arogoji Molungkimong tenzük. Dr. Clark Molungkimong nung anogo pungu monger Godhula, tebutsü Lucy toktsür Sibsagari meyiba alu. Dr. Clarki ashi, nenoki angati ku khu bener ni meyina atu, tamanger atema kecha masü saka limapurtem atema sen Rs. 14 taa ama agutsüa liasü, saka iba senji pa meyiba aludang yimsüsürtemi nü mission wadang nung amshiang ta shir meyiba tenla agutsü. Ibai Ao kin aser Naga kin rongnungi mezüngbuba American Baptist Foreign Mission Society nem tenla agutsüba alitsü.

Dr. Clark, Godhula aser Supongmeren parnok aseme Yisu yimsü tajung asen limai bener aruba yong tanu lanurtem tashitemetet jenjang aika nung tanger menepa tenük lapoka kumergo. Asen Naga nungertemi par mapa tajung kodanga mamali, parnoki pendanga magutsüasübo tanu asenok ano tammang jenjang nungsa lila ta bilemer.

Tanü Molungkimong limaji tanapuba Isreal lima ama kümergo, iba yimdak mezüng mokozi agi signal sayuba lir, Nokinketer 60 monument lir, Mezüng Naga lima nung Baptiba tzübo lir, Dr. Clark gate aser kneeling place lir, ano Dr. Clark Monument aser Museum lir. Anungji mongpo nungpo Naga nung kin balala aser asen Aor arogo aika nungi Dr. Clark jajaba leman nungji Mission Walk ta tenung jar aika kanga temoatsü ngua jajar aser Molungkimong nung aliba Historical place tem repranga kanga temoatsü anguba kuli aika lir. Maneni amangbapur kar danga iba temoatsü aginura Isreal isa moaka Molungkimongi ora küsa temoatsü ngulanglang ta tanü anogo 22nd Dec. 1872 bilemteta iba oset ya lemsateper.

ANOGO ABEN TSÜNGREM DEN

YISU YA SHIBA?

Yisu aser pa nütsüngtem Kaisaria lima nung aliba Filipi-i aru, aser pai lendang pei nütsüngtem dang asüngdang, 'Nisungtemi ni shiba-a ta ashir?' Mark 8:27

Yisu ya shiba ta nü danga asüngdang nung nü telangzüba kechi asütsü? Tanü aikati pei taküm nung ajangshiba dak ajemdaker Yisuji shiba iba teratetba balala agütsür. Kar asoshi tekümzüker, taneptsür, tesayur mesüra kar asoshibo Pa nisung ka ta yamala mesük nungja balala agütsüba ajanga Pa meteter. Tanü agüja aliba Lai kodang züngdir Yisu aser pa nütsüngtem Filipi yimti arudang pai pei nütsüngtem dang kasaji asüngdang 'Nisungtemi ni shiba-a ta ashir?' ta asüngdangdang parnoki langzü 'Yohan Baptitsüba ta' kari 'Elia ta' aser ano kari 'Ainkar rongnung ka' ta ashi.v28 Idangji Yisui parnok dang ano asüngdang 'saka nenokia ni shiba-a ta ashir?' Peteri pa dang shitak langzü, "Na taküm Tsüngrem chir Khristaji lir." Mathi 16:16 Adianu, na asoshia Yisuji shibar nai shitak shitetsü asü? Alimaibo tapu tapu ashitsü akok saka tamanger tajung ka ama chichiba Yisu asenok takümi jangjaa meteta lir ma? Pa Tsüngrem chir Yisu Khrista ta Peteri langzüba ama asenok tamang aser tanela ajongai agizüka nangzüktedi ma? Yisu ya shiba-a chichia memetet tashi na aser ni Tsüngrem chir ka ta züngshitsü metemsü.

Arung, Yisu Khrista shiba taküm ajanga asenok menen ajak alangzük, Pa asenok taküm, mulungjang, mulungsentsü aser tashi ajonga agi agizüka pa den teti nentaka jajatsü asen tamang nukjidong südi. Amen.

Syria nung nisung kari Greek Orthodox Arogo Tenla ki amak

December 21, 2024: Tang Rights (SNHR)-ia Tenla ki Syria nung tensa tera mejungi amakba tatalokbaji aitsüogo. aliba mapang ka nung Tang tashi nungbo Bodhbarnü (December 18) aibelenertemji mejangja saka iba tesem nung Jihadist telok Ansar al-Tawhid-i kanga bulua amaker.

"Hama nung Greek Orthodox Archdiocese amakbaji SNHR-i sashia aitsür. Tekülem kitem aser yimsü temaitsütem raksatsübaji International meimchir temeden ozüng aser United Nations General Assembly nung bangzüng 75/258 alema lir," ta metetdaksü.

Prangpong amer nisung kari Tenla kidang jara nung injang kitem aser yimsü temaitsütem raksatsübaji International meimchir temeden ozüng aser United Nations General Assembly nung bangzüng 75/258 alema lir," ta metetdaksü.

Police-i sangdong ka ajanga, "Hama nung Greek Orthodox Archdiocese-i parnok Tenla kidang injang khaloktsüba osang onok nem metetdaksü. Iba sülen Hama nung Police-i aibelenertem aputsü bushidar," ta metetdaksü.

Osang angazükba agi, Assad yimsüsüba atsüngdok. Iba sülen HTS tongti lenir, Ahmed al-Shara-ibo Syria nung Khristantem densema minorities kümzüksü, ta nangzükogo.

AO OSHI ANGAZÜKDAK:

TANÜ ANGAZÜKTSÜBA OJANG

Tatotsü

(adv) tepok tudaka atua kangshiba (stomach pain)

* Tepok nung tatotsü atua kangshira yakta mozü ki atongtsüla.

Tatsü

(adj) talang masü (short)

* Sepai nung tar tatsü magir.



Tir Yimyim

OLONG PAITEP # 7017

1			2			3			4
			5		6		7		
8									
			9						
	10								
								11	12
			13				14		
15						16			

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. ___ adenshi - (4)
- 14. Tsünüsenbongsü adokdak - (3)

OLONG PAITEP # 7016 TELANGZÜBA

TIPIEN :

- 1. Tesüngjem, 5. Tetemsü,
- 6. Oro, 7. Anüshi, 8. Rür,
- 9. Ozü, 11. Lemjem, 14. Anü,
- 15. Lungkak, 16. Ashikülak

LANGTSÜNGLEN :

- 2. Entsü, 3. Mersü, 4. Otia,
- 10. Zünga, 12. Jakla,
- 13. Maka

NAI-A YA METETTER MA



Jinan ya nisung million 9.4 aliba yimti ka lir aser East China kübok Shandong Province yimtiba lir.

Iba yimti nung alima nung "largest-diameter underwater shield tunnel" yanglutetogo.

Alima nung tunnel boring machine (TBM) tulutiba amsiha China Railway 14th Bureau Group Co., Ltd-i 3.6-mile (5,755 m) tunnel nung section tongtiba tudar ajisüaka parnoki 2-mile (3,290-m) section renemogo.

Jinan Huanggang tunnel nung lenmang anatsülen six lanes alitsü aser double-decker configuration keta yanglur.

Assam Congress president-i Mridul Islam kinungtsü atema mapa meshitsür

Guwahati, December 21, 2024 (Agencies): December 18 nü 'Raj Bhawan Chalo' lungkak aitba mapang taküm samaba Congress züngsem Mridul Islam atema Assam Pradesh Congress Committee president Bhupen Borah-i Chief Minister Himanta Biswa Sarma dangi shidi ka züluogo.

Mridul Islam ya lanur advocate aser Congress züngsem ka liasü aser police-i tashiyim inyakdang pa taküm sama ta Borah-i ashi.

"December 18, 2024 nü Congress züngsemtemi Raj Bhavan tashi lungkak aita jajadang police-i tashiyim inyakba ajanga lanur advocate Mridul Islam taküm sama. Iba mapang media outlets aika liasü aser parnokia Assam Police tashiyim ajanga Islam asüba kuli agütsütsü" ta pai CM Sarma dang ashi.

Lanur advocate asüba ya takoksa ulura lir aser tasüri pa kinungtsü den tila tanur ana toktsür ogo ta Borah-isa ashi.

Borah-isa CM Sarma dang Islam kinungtsü nem lar home district Kamrup (Rural) nung sorkar mapa ka agütsütsü mepishioo.

"Islam-i Hamida Parbin aser tila tanur ana toktsür ogo anungji aria bilemstüba sayua Hamida Parbin nem sorkar mapa ka agütsütsü mepishir" ta pai ashi.

December 20 nü Mridul Islam asüba atema temeten meshia lungkak aitdang Guwahati police-i Assam Congress president Borah den külemi Congress lennirtem Ripun Borah, Uday Bhanu Chib, senior spokesperson Ratul Kalita nung apu.

Congress lennirtemisa Bodbarnü linük ajungalen lungkak aita liasü aser Jammu, Chandigarh, Guwahati, aser Patna nungbo parnoki Raj Bhavan tashi jajayonga ao.

Union Home Minister Amit Shah-i BR Ambedkar indang olen jembiba, Manipur nung tensa mesüngjemba, Adani ashishitep ken o aser Jammu & Kashmir nem statehood agütsütsü onüktem atema Congress züngsemtemi lungkak ait. Iba anogo nung state balala nung Congress züngsem ana asü.

PELABA LEMSATEPER



Wb. Moasangba

20:04:1939 - 12:12:2024.

Onoki teti meima aliba tsürabur Wb.Moasangba asüba anogo nung kidang-kiyonger, kinunger, yimtsür- yimer, tembar-medemertem ana aser talang nungi shirnokisa nübo, rongsen aser sarasadem agi ozü mulung zürep mapang nung yaritepogo, nenok ajak dang kanga pelaba lemsateper.

Teyanglur Tsüngremi onok dang meima yaritepertem ajak moajangma ta ozüi sarasademtsür.

- Temeim kinungtsü, jalatem, jabaso aser Semchisemnur.

Assam STF-i Ansarullah Bangla Team (ABT) züngsem 8 apu

Guwahati, December 21, 2024 (Agencies): Indian Subcontinent (AQIS) nung Al-Qaeda en yariteper Ansarullah Bangla Team (ABT) züngsem 8 tashi Assam Police-i puogo. Assam Police nung Special Task Force (STF)-i December 19, 2024 nü parnok apu aser Guwahati court kati parnok anogo 10 nü police ket nung ayutsü temelaba agütsüogo.

"Onoki apuba nisung 8 okadaki anir ao aser parnok anogo 10 nü police ket nung ayutsü melaogo. Onoki pen drives 4 aser taitüsü aketba kulikakettem nguogo aser ibaji onoki asadangdar. Parnok 8 rongnung Bangladeshi nung ka dena lir" ta IGP (STF) Partha Sarathi Mahanta-i ashi.

Bangladeshi nung ya arishi küm 36 tain Md. Sad Radi (Shab Seikh) ta jangjaogo aser pa ya Rajshahi, Bangladesh nung alir ta Mahanta-i ashi.

Pai November 2024 nü

India telungi ait aser sleeper cells amenok ta pai ashi.

"Sad Radi-i Assam aser West Bengal semdang aser Ansarullah Bangla Team (ABT) nung sleeper-cell activists den ajurutep. Iba sülen pa kasa nükjidong atema Kerala-i ao aser Assam STF-i Kerala police teyari agia pa apu" ta Mahanta-isa metetdaksü.

Assam police-isa West Bengal police teyari agia Minarul Sheikh (40) aser Md. Abbas Ali (33) na apu. Maneni Kokrajhar aser Dhubri district tem nung Nur Islam Mandal (40), Abdul Karim Mandal (30), Mojibar Rahman (46), Hamidul Islam (34) aser Enamul Hoque (29) nung apu ta pai ashi.

Assam police-i STF IGP, Dr. Partha Sarathi Mahanta lenisüba kübok "Operation - Praghat" tenzüc aser Jihadi nung jangjatsü atema telok balala tesem balalai yoka liasü.

Meghalaya sorkari arrtsü ken o atema Assam dang tezü atanger

Shillong, December 21, 2024 (Agencies): Assam sorkari arrtsü ken o angatetteptsü atema shilem tanabuba nung temulung magütsür ta Meghalaya sorkari tebilemstü abenba metetdaksüogo.

"Onoki Assam nung külem MLA aser ketdangsurtem den tebilemstü lemsatepogo. West Khasi Hills DC-i Kamrup DC den aser nia Assam Chairman, Chandra Mohan Patowary den iba onük jembioo" ta Cabinet Minister Paul Lyngdoh-i ashi. Pa ya West Khasi Hills regional committee chairman lir.

Sensotem aser yimten lennirtemi olemtep tenzüksü aser arrtsü ken o tem angatetteptsü atema rongshia arur aser iba atema Lyngdoh-i iba osang metetdaksü.

"Assam sorkar nungi telangzüba mangur saka tang tashi onoki olemteptsü tenanzükba nung noktaka lir.

Kobi melii olemtep tenzüksü imlar" ta Lyngdoh-i ashi.

March 2023 nung Assam aser Meghalaya tsünga küm aika arrtsü atema atsütepa aruba angatetteptsü asoshi agreement ka nung sign sütepa liasü. Idangji Union Home Minister Amit Shah-ia iba agreement ya Northeast atema otsüsütsü anogo ka lir ta ashi.

Mezüngbuba shilem nung tesem 6- Gizang, Tarabari, Boklapara, Khanapara-Pilangkata, Ratacherra, aser Hahim atema angatettep. Iba nung Assam nem ali tasazük 18.51 sq km aser Meghalaya nem 36.79 sq km lezmükja liasü.

Tanabuba shilem nung Langpöh, Borduar, Deshdoomreah, Block I-II, Psiar-Khanduli, aser Nongwah-Mawtamur (Garbhanga) atema ken o angatetteptsü sentong lir.

ISSF Junior World Cup ayongzüka asayatsü NRAI nem temelaba agütsü



Luchii/December 21, 2024 (Agencies): International Shooting Sport Federation (ISSF) Junior World Cup Rifle/Pistol/Shotgun 2025 ayongzüka asayatsü atema National Rifle Association of India (NRAI) nem temelaba agütsüogo.

2023 küm Bhopal nung senior world cup aser taküm küm tetenzüklen season-ending ISSF World Cup Final asayaba sülen tang agi tasembububa ISSF indang asayamung tongtumbang ka India nung ayongzüka asayatsü lir.

"Taoba ita Rome nung ISSF executive committee senden kanga tajanzük ka-a menogo aser member federations ajak aser ISSF tir Luciano Rossi nung nung ajaki India nung

international Shooting asayamung tongtumbangtem kanga junga ayongzüka asayaba aser alima ajunga nung iba asaya renloka aotsü atema teyari agütsüba atema tenüngsang agütsüogo. Tang official telangzüba anguba sülen onok kanga pelateper aser tajungtiba inyaksü atema ajungmesor lir. Iba asaya linük nung renloka aotsü atema India sorkar aser Ministry of Sports-i takokba lenmang ajak nung teyari agütsüba atema kanga pelar," ta NRAI tir Kalikesh Narayan Singh Deo-i, ISSF nungi official confirmation shiti anguba sülen ashi.

"ISSF-i shiti nung September-October ita nung mesüra October tatemi aser November

tetenzülen iba asayamung ayongzüka agütsü atema osang agütsütsü mepeshia asüngdangogo. Onok yongtsü nung senden amenba sülen parnok nem takaratiba nung osang agütsütsü, ajita asünungdang member federations tem renemshitetsü. Shooting asaya nung tarutsü champions aser stars tem India nung asayamung ka asoshi adenshitsu aser iba ajanga linük nung iba asaya grassroots jenjang nung terenlok asoshi teyari agütsütsü," ta NRAI secretary general K. Sultan Singh-i ashi.

Taoba küm ter tsüngda India nung tang agi tongtumbang Shooting asayamung tekububa ayongzüka asayatsü lir, saka ISSF Junior World Cup bo mezüngbuba asütsü. Iba asayamung ayongzüka masaya tsüngda India nung continental championships aser ISSF asayamung trok ayongzüka asayaogo, kong World Cup Final ana aser senior ISSF World Cups pezü densema lir.

2025 küm tepeyong India nung range tem kanga mazüngi alitsü, kechiyong mezüngbuba Shooting League of India (SLI)-a küm tetenzüklen asayatsü asoshi sentong yanglua lir aser iba den küm tepeyong teti ama national asayamung tem asaya-a orr nationals nung tembangtsü.

United nungi asayar Mason Mount hopta ishika masayatetsü

Luchii/December 21, 2024 (Agencies): Mason Mount yiruba sülen hopta ishika masayatetsü, ta Manchester United head coach Ruben Amorim-i metetdaksüogo.

Deobarnü Manchester City goal 2-1 agi akokba asaya nung minute 14 dang asayaba sülen midfield asayar ya tetsü nung timtem adoka tuguatok.

Mount taoba küm Chelsea nungi United nung oa adenba sülen pa yiruba ajanga junga masayateti arur tang ano yirushiogo. Taoba season tenzüka sülen pa Premier League nung asaya ti nung dang tetenzük nungi asaya lir.

Mount koba mapang tashi nung taneptsü angütsü iba indang Amorim-i osang tejangja magütsü, aser pa hopta ishikabo masayatetsü ta dang ashi.

"Ni anogo tejangjaji memetet, saka pa mapang talangka masayatetsü. Ajisüaka iba ya football asaya yimya ka dang aser onok maneni asayayonga aotsü. Pa taneptsü bushiba mapa ni inyaktetsüba ajak agi 'Mase' nem club asayaba yimya koda asayatsü iba indang tangazükba agütsüba ya dang asütsü," ta pai ashi.

"Mason Mount nem onoki teyari agütsütsü. Asayar ka mapang talangka masayatsüba ya kanga tasak lir aser pai kanga merangdangdar," ta paisa shisem.

Kasa mapang nung United nungi asayar Victor Lindelof-a Brehostibarnü English League Cup nung Tottenham goal 4-3 agi makokba asaya nung halftime matongdang tuguatok aser Luke Shaw-a tetsü yiruba ajanga masayateti lir.

Anmolpreet-i India nunger rongnungi List A century takaratiba yanglu



New Delhi, Luchii/December 21 (Agencies): Punjab nungi asayar Anmolpreet Singh-i, India nunger batter tem rongnung List A century takaratiba yangluba sülen otsü tasen ka yangluogo.

Honibarnü Vijay Hazare Trophy nung Arunachal Pradesh den Ahmedabad nung asayaba mapang Anmolpreet Singh-i ball 35 nung century ka yanglua iba otsü tasen yangluogo.

Pai ball 35 nung century ka yangluba ya List A asaya nung century takaratiba yangluba rongnung tasembuba aser India nunger rongnung takaratiba lir. Pa ya Australia nung asayar Jake Fraser-McGurk (29 balls) aser South Africa nung AB de Villiers (31 balls) na sülen tasembuba nung lir.

ODI nung century takaratiba yangluba record ya De Villiers-i maneni bener lir. Pai 2015 küm January ita Johannesburg nung West Indies den asayaba


mapang South Africa atema ball 44 nung run 149 yanglua liasü.

Anmolpreet-i iba century rongnungi Yusuf Pathan-i century ka takaratiba yanglur liasü. Pathan-i 2009-10 Vijay Hazare Trophy nung Baroda nungi Maharashtra den asayaba mapang ball 40 nung century ka yanglua liasü.

Anmolpreet-i kanga jung asayaba sülen Punjab-i iba asaya ya wicket teku agi ayong ayonga koka liasü. Arunachal Pradesh team-i run 164 yanglur aliba ya parnoki over 12.5 nung dang menep. Pai out mesüi ball 45 nung run 115 yanglu, kong four 12 aser six 9 densema liasü.

Anmolpreet, shiba taoba mapang IPL nung Mumbai Indians (MI) aser Sunrisers Hyderabad (SRH) nungi asaya liasü, pa mapang tatsüka junga masayateti aruba sülen taoba ita mega IPL auction nung shingai meshimi liasü.

Australia-i Boxing Day Test atema Konstas shimogo



Sam Konstas

Luchii/December 21, 2024 (Agencies): India den tanungba Test ana asayatsü atema Australia-i Nathan McSweeney toktsür arishi küm 19 tain opener Sam Konstas team nung züngoksemogo.

New South Wales nungi Konstas ya Australia nung tebur asayrtem rongnungi 1953 küm Ian Craig sülen Test asaya nung batsmen tem rongnungi tanobusang akümtsü renema lir.

Iba asayamung metenzük tsüngda Konstas melena McSweeney shima liasü, saka pai innings trok nung run 72 dang yanglu aser pa indang average 14.40 lir.

Australia indang chief selector George Bailey-i ashiba agi, Konstas shimba ya India nung bowler tem atema balaka asütsü, kechiyong parnoki pa den asayadanga mali.

"Sam indang asayaba yimya ya Nathan dang nungi balaka lir," ta pai ashi.

Iba season tetenzüklen Konstas-i Sheffield Shield nung South Australia den asayaba mapang century ana yanglu aser 1993 küm Ricky Ponting-i century ana yangluba sülen pa ya iba alizüng tongtetba asayar tanobusang aküm.

Taruba Test asaya nung

asayatsü atema pa shimra pa ya Australia nung asayatem rongnung skipper Pat Cummins sülen asayar tanobusang akümtsü. Cummins ya 2011 küm arishi küm 18 ser anogo 193 asüba mapang mezüngbuba South Africa den asaya liasü.

Seamer Jhye Richardson, shiba Test asaya tatensa 2021-22 Ashes nung asaya liasü, pa-a Josh Hazlewood melen team nung züngoksemogo.

Fast bowler sa Sean Abbott aser all-rounder Beau Webster nata team nung züngoksema lir. Tena tang tashi team nung züngoksemaka Test asaya ka nung danga Australia tenüng nungi asaya mali.

Usman Khawaja aser Marnus Labuschagne nata iba asayamung nung junga masayateti arudar, saka tenata maneni team nung dena lir.

Melbourne nung Boxing Day Test ya December 25 nü 23:30 GMT nung tenzütsü.

India den tatembangbuba Test ana atema Australia team:

Pat Cummins (captain), Travis Head, Steve Smith, Sean Abbott, Scott Boland, Alex Carey, Josh Inglis, Usman Khawaja, Sam Konstas, Marnus Labuschagne, Nathan Lyon, Mitchell Marsh, Jhye Richardson, Mitchell Starc, Beau Webster.

BILEMDANGANG

"Taküm nung jangratemji alizüng atongbaji masü saka aji atongtsü jajaba lemangbaji lir."